

სსიპ „კულტურის, სპორტისა და ახალგაზრდულ საქმეთა სააგენტო“

„აფხაზეთის კულტურულ-შემოქმედებითი განვითარების ხელშეწყობის“ პროგრამის (პროგრამის კოდი: 06 27 02) განხორციელების წესი

მუხლი 1. ზოგადი დებულება

1. ეს წესი განსაზღვრავს აფხაზეთის ავტონომიური რესპუბლიკის ბიუჯეტის ასიგნებებით გათვალისწინებული პროგრამის „აფხაზეთის კულტურულ - შემოქმედებითი განვითარების ხელშეწყობა“ (კოდი: 06 27 02) და მასში შემავალი ქვეპროგრამების: „სამემსრულებლო ხელოვნება“ (კოდი: 06 27 02 01); საიუბილეო და შემოქმედებითი ღონისძიებები, ტრადიციული და სახალხო დღესასწაულები“ (კოდი: 06 27 02 02); „ფესტივალებისა და კონკურსების ხელშეწყობა“ (კოდი: 06 27 02 03), „ინკლუზიური პროექტების ხელშეწყობა“ (კოდი: 06 27 02 04); „საგამომცემლო საქმიანობის ხელშეწყობა“ (კოდი: 06 27 02 05) განხორციელების პირობებს და პროცედურებს.

2. ამ წესის შესაბამისად, პროექტის დაფინანსების მიზნით, სსიპ „კულტურის, სპორტისა და ახალგაზრდულ საქმეთა სააგენტო“ (შემდგომში - სააგენტო) ქმნის განაცხადის განმხილველ კომისიას (შემდგომში - კომისია), რომელიც განიხილავს შემოსულ განაცხადებს და შეარჩევს დაფინანსებისთვის.

3. კომისიის საქმიანობის წესი მტკიცდება სააგენტოს დირექტორის ბრძანებით.

მუხლი 2. დაფინანსების მიმღები სუბიექტი

დაფინანსების მიმღები სუბიექტი შეიძლება იყოს, საქართველოს კანონმდებლობის შესაბამისად, საქართველოს ტერიტორიაზე რეგისტრირებული იურიდიული პირი.

მუხლი 3. განაცხადის წარდგენა

1. დაფინანსების მისაღებად, საქართველოს კანონმდებლობის შესაბამისად, საქართველოს ტერიტორიაზე რეგისტრირებულმა იურიდიულმა პირმა წერილობითი განცხადებით უნდა მიმართოს სააგენტოს, რომელსაც უნდა ერთვოდეს: სრულყოფილად შევსებული საპროექტო განაცხადი, რომლის ფორმასაც ამტკიცებს სააგენტოს დირექტორი.

2. საპროექტო განაცხადი ორიენტირებული უნდა იყოს კულტურის სფეროს განვითარებაზე სააგენტოს პროგრამებისთვის გათვალისწინებული პრიორიტეტების შესაბამისად, კერძოდ, უნდა უზრუნველყოფდეს კულტურის ხელმისაწვდომობას, ქართულ - აფხაზური შემოქმედებითი პროცესების სტიმულირებას, ახალგაზრდა ხელოვანების საქმიანობის პოპულარიზაციას, კულტურის ტრადიციული და ახალი დარგების (სამემსრულებლო,

ვიზუალური, შემოქმედებითი მიმართულებები და სხვა) გაძლიერებას, აფხაზური კულტურის ინტეგრირებას საერთო კულტურულ რუკაზე, მის გატანას საერთაშორისო დონეზე და ინკლუზიური პროექტების ხელშეწყობას, ასევე, დამოუკიდებელი სახელოვნებო ორგანიზაციების, ჯგუფების და ხელოვნების მიერ წარმოდგენილი პროექტების განხორციელების ხელშეწყობას.

3. საპროექტო განაცხადის ფორმას და წარსადგენი დოკუმენტების ნუსხას განსაზღვრავს სააგენტო.

4. სააგენტო ამოწმებს საპროექტო განაცხადის შესაბამისობას განაცხადისათვის დადგენილ ფორმასთან და ამ წესთან.

5. თუ, დაინტერესებული სუბიექტის მიერ წარმოდგენილი განაცხადი არ შეესაბამება დადგენილ მოთხოვნებს ან/და არ არის წარმოდგენილი სააგენტოს მიერ განსაზღვრული დოკუმენტაცია, სააგენტო დაინტერესებულ სუბიექტს ხარვეზის გამოსასწორებლად განუსაზღვრავს გონივრულ ვადას.

6. სააგენტოს მიერ განსაზღვრულ ვადაში ხარვეზის გამოუსწორებლობის შემთხვევაში განაცხადი ვერ გადავა განხილვის შემდეგ ეტაპზე.

მუხლი 4. განაცხადის განხილვა და დაფინანსება

1. „აფხაზეთის კულტურულ - შემოქმედებითი განვითარების ხელშეწყობის“ პროგრამის ფარგლებში გათვალისწინებული ქვეპროგრამების ღონისძიებების დაფინანსება შესაძლებელია განხორციელდეს სრული დაფინანსებით ან თანადაფინანსებით.

2. პროგრამა არ მოიცავს ინვენტარისა და ძირითადი საშუალებების შეძენას.

3. პროგრამის ფარგლებში საგამომცემლო საქმიანობის დაფინანსებისას, ბეჭდვის კომპონენტის ნაწილში სააგენტო ხელმძღვანელობს და აცხადებს ტენდერს „სახელმწიფო შესყიდვებით შესახებ“ საქართველოს კანონმდებლობით დადგენილი წესით.

4. განაცხადის განხილვისას და დაფინანსების ოდენობის განსაზღვრისას, მხედველობაში მიიღება განაცხადის შესაბამისობა ამ წესით დადგენილ პრიორიტეტებთან, პროექტის დასაბუთებულობა და ინტელექტუალური ღირებულება, აგრეთვე, განმცხადებლის გამოცდილება და უნარი განახორციელოს წარდგენილი პროექტი.

5. თუ წარდგენილი განაცხადით მოთხოვნილი თანხა აღემატება 15 000 (თხუთმეტი ათასი) ლარს, განაცხადის დადებითად შეფასების შემთხვევაში კომისია განაცხადის დაფინანსების შესახებ (თანხის ოდენობის მითითებით), რეკომენდაციით მიმართავს სააგენტოს დირექტორს, რათა მან აღნიშნული პროექტი ინფორმირებისთვის წარუდგინოს მაკონტროლებელს - აფხაზეთის ა/რ განათლებისა და კულტურის სამინისტროს.

6. ერთი და იმავე განმცხადებლის მიერ წარდგენილი განაცხადი შესაძლებელია დაფინანსდეს კალენდარული წლის განმავლობაში არაუმეტეს 2-ჯერ.

7. განაცხადის განხილვისას მხედველობაში მიიღება პროექტის ბიუჯეტის ოპტიმალურობა, თანადაფინანსების არსებობა და მოხალისეობრივი ჩართულობა.

8. კომისია წარმოდგენილ მასალებსა და გარემოებებზე დაყრდნობით აფასებს პროექტის წარმატებით განხორციელების წინაპირობებს.

მუხლი 5. დაფინანსების გაცემა

პროექტის დაფინანსება განხორციელდება სააგენტოს დირექტორის ბრძანებით (ინდივიდუალურ ადმინისტრაციულ-სამართლებრივი აქტი), რომლის საფუძველს წარმოადგენს კომისიის მიერ დამოუკიდებელი, დადებითი გადაწყვეტილება (საოქმო გადაწყვეტილება).

მუხლი 6. ხელშეკრულების დადება

1. სააგენტოსა და დაფინანსების მიმღებ სუბიექტს შორის პროექტის განხორციელებასთან დაკავშირებული საკითხები წესრიგდება მხარეებს შორის გაფორმებული ხელშეკრულებით.
2. ამ მუხლის პირველი პუნქტით გათვალისწინებული ხელშეკრულების დადების საფუძველია კომისიის გადაწყვეტილების საფუძველზე, სააგენტოს დირექტორის მიერ გამოცემული ინდივიდუალური ადმინისტრაციულ-სამართლებრივი აქტი პროექტის დაფინანსების ან თანადაფინანსების შესახებ.
3. ხელშეკრულების დადების, შეცვლის, შეჩერებისა და შეწყვეტის წესი რეგულირდება საქართველოს მოქმედი კანონმდებლობით.
4. ობიექტური მიზეზებიდან გამომდინარე ან/და ფორსმაჟორულ შემთხვევებში, სააგენტოსა და დაფინანსების მიმღებ სუბიექტს შორის გაფორმებულ ხელშეკრულებაში თანხის, ღონისძიების ადგილის, ვადების ან სხვა არსებითი პირობების ცვლილება განხორციელდება ხელშეკრულებით გათვალისწინებული შეთანხმების თანახმად.

მუხლი 7. თანხების ხარჯვის შესახებ ანგარიშის წარდგენა და კონტროლის განხორციელება

1. ამ წესის ფარგლებში მიღებული გადაწყვეტილებებისა და პროექტის შესრულების კონტროლს ახორციელებს სააგენტო, წინასწარ განსაზღვრული მონიტორინგის მექანიზმებით:
 - ა) სააგენტო უფლებამოსილია განახორციელოს მონიტორინგი პროექტის მიმდინარეობის ნებისმიერ ეტაპზე;
 - ბ) სუბიექტი ვალდებულია პროექტის დასრულების შემდეგ წარმოადგინოს ჩატარებული სამუშაოს ანგარიში;
 - გ) სუბიექტი ვალდებულია წარმოადგინოს პროექტის ამსახველი ფოტო ან ვიდეო მასალა.
2. დაფინანსების მიმღები სუბიექტი ვალდებულია (ღონისძიების დასრულების შემდგომ, არაუგვიანეს 20 (ოცი) კალენდარული დღისა, წარადგინოს მიზნობრივი ხარჯვის დამადასტურებელი დოკუმენტაცია და ინფორმაცია, სააგენტოს დირექტორის ბრძანებით დამტკიცებული, „პროექტების შესრულების ანგარიშის ფორმის“ შესაბამისად.
3. ამ მუხლის მეორე პუნქტით გათვალისწინებულ ვადაში ხარჯვის დამადასტურებელი, შესაბამისი დოკუმენტის წარმოუდგენლობის შემთხვევაში არ ანაზღაურდება სააგენტოს მიერ.
4. ფინანსური ანგარიში წარმოდგენილი უნდა იქნეს ხელშეკრულების შესაბამისად.

მუხლი 8. დაფინანსების ადმინისტრირება

1. სააგენტო უფლებამოსილია განაცხადების დაფინანსება გასცეს ეტაპობრივად.

2. დაფინანსების მიმღები სუბიექტი ვალდებულია განახორციელოს ფინანსების ხარჯვა მიზნობრივად, სააგენტოსა და იურიდიულ პირს შორის გაფორმებული ხელშეკრულების შესაბამისად.

3. დაფინანსების მიმღები სუბიექტი უფლებამოსილია მიმართოს სააგენტოს წერილობით, ბიუჯეტის პუნქტებს შორის თანხების გადანაწილების თაობაზე, რაც გაფორმდება შეთახმების აქტით.

მუხლი 9. ანგარიშსწორება

1. დაფინანსების მიმღებ სუბიექტს თანხა გადაერიცხება ეროვნულ ვალუტაში - ლარში.

2. დაფინანსების მიმღები სუბიექტის მიერ წარმოდგენილ ხარჯთაღრიცხვაში (მთლიანად ან ცალკეულ პუნქტებში) უცხოური ვალუტის (ლართან მიმართებით) სავარაუდო გაცვლითი კურსის მითითების შემთხვევაში, აღნიშნულის გათვალისწინებით, სააგენტოს მხრიდან დაფინანსების მიმღებ სუბიექტს იურიდიულ პირს შესაბამის ანგარიშზე ჩაერიცხება მის მიერ მოთხოვნილი საერთო თანხა ლარში (იმ დროისათვის ეროვნული ბანკის მიერ არსებული გაცვლითი კურსის შესაბამისად).